



Titah Ucapan

**DULI YANG MAHA MULIA YANG DI-PERTUAN BESAR
NEGERI SEMBILAN DARUL KHUSUS**
TUANKU MUHRIZ IBNI ALMARHUM TUANKU MUNAWIR
D.K., D.M.N., D.K. (PERAK), D.K. (PERLIS), D.K. (SELANGOR), D.K. (KEDAH),
D.K. (KELANTAN), D.K. (TERENGGANU), D.K.Y.R., P.P.T.

Di Istiadat Pembukaan
Persidangan Pertama Penggal Keempat
Dewan Undangan Negeri ke-14
Negeri Sembilan Darul Khusus

Jumaat, 3 September 2021
25 Muharam 1443 Hijrah
Dewan Undangan Negeri
Negeri Sembilan Darul Khusus



**DULI YANG MAHA MULIA YANG DI-PERTUAN BESAR
NEGERI SEMBILAN DARUL KHUSUS**
TUANKU MUHRIZ IBNI ALMARHUM TUANKU MUNAWIR
D.K., D.M.N., D.K. (PERAK), D.K. (PERLIS), D.K. (SELANGOR), D.K. (KEDAH),
D.K. (KELANTAN), D.K. (TERENGGANU), D.K.Y.R., P.P.T.

**TITAH UCAPAN
DULI YANG MAHA MULIA
YANG DI-PERTUAN BESAR
NEGERI SEMBILAN DARUL KHUSUS
DI ISTIADAT PERSIDANGAN PERTAMA (PERASMIAN)
PENGGAL KEEMPAT,
DEWAN UNDANGAN NEGERI KE-14
PADA 3 SEPTEMBER 2021**

Bismillahir Rahmanir Rahim.

Assalamualaikum Warahmatullahi Wabarakatuh dan Salam Sejahtera.

Yang Di-Pertua Dewan dan Ahli-Ahli Dewan Undangan Negeri Sekalian.

1. Terlebih dahulu, Beta memanjatkan setinggi-tinggi kesyukuran ke hadrat Allah SWT kerana setelah sekian lama persidangan Dewan Undangan Negeri ditangguhkan, pada hari ini Istiadat Pembukaan Rasmi Persidangan Pertama Penggal Keempat Dewan Undangan Negeri ke - 14 dapat dijalankan. Beta juga bersyukur kerana dianugerahkan kesihatan untuk

berangkat ke Istiadat Pembukaan ini, yang juga dihadiri Orang Kaya Beta dan Tunku Besar Tampin serta semua yang ada pada hari ini.

Pendahuluan

2. Alhamdulillah, walaupun kita masih menghadapi cabaran dan dugaan khususnya akibat pandemik COVID-19, keharmonian, keselamatan dan keamanan terus dinikmati oleh seluruh rakyat negeri ini. Dengan iltizam dan kesepakatan semua pihak, Negeri Sembilan telah berjaya memasuki Fasa 3 Pelan Pemulihan Negara (PPN) mulai 4 September ini. Marilah kita sama-sama berdoa dan berusaha secara bersama agar dugaan ini segera berakhir dan negeri yang kita kasih ini terus dilimpahi kemajuan dan kemakmuran yang akan dinikmati oleh sekalian rakyat tanpa dibatasi sempadan kaum, bangsa, agama dan politik.
3. Dalam mengharungi situasi yang mencabar dan getir ini, Beta mengucapkan tahniah kepada Kerajaan Beta pimpinan Menteri Besar, Dato' Seri Haji Aminuddin Bin Harun yang telah melaksanakan pelbagai tindakan dan inisiatif dengan penuh komited untuk memastikan kesejahteraan rakyat terus terpelihara. Pada masa yang sama, dasar-dasar pemulihan turut dirangka dan dipacu bagi memastikan pembangunan ekonomi negeri ini terus berkembang dan mampan.
4. Beta juga amat menghargai peranan, komitmen serta dedikasi yang ditunjukkan oleh semua petugas barisan hadapan, serta mereka yang

membantu di belakang tabir dalam usaha menangani penularan pandemik COVID-19. Sesungguhnya mereka ini adalah insan istimewa yang terus berkhidmat tanpa mengenal erti letih dan lelah. Oleh itu, sama-sama lah kita prihatin dan membantu mengurangkan beban mereka dengan terus mematuhi Tatacara Pengendalian Piaawai (SOP) seperti yang telah ditetapkan dalam usaha memutuskan penularan pandemik COVID-19.

5. Selain dugaan pandemik COVID-19, negara kita juga telah mengalami beberapa cabaran dan situasi yang memberikan kesan kepada kestabilan politik dan menjadikan pertumbuhan ekonomi - keadaan ini meresahkan rakyat. Sehubungan itu, Beta berharap semua pihak di dalam Dewan ini mengambil ictibar dan teladan daripada peristiwa yang telah berlaku di sekeliling kita. Semua Ahli Dewan hendaklah mematuhi matlamat dan amanah yang dipertanggungjawabkan dan bekerjasama dengan penuh integriti dan akauntabiliti demi rakyat tanpa ada kepentingan peribadi.

Bantuan, Inisiatif dan Insentif Berkaitan COVID-19

Ahli-Ahli Dewan Sekalian,

6. Kesan penularan pandemik COVID-19 menjadikan hampir kesemua sektor ekonomi dunia dan Malaysia. Negeri Sembilan juga tidak terkecuali dan turut menerima impak negatif tersebut. Dalam situasi ini, tindakan proaktif telah diambil oleh Kerajaan Beta dengan menyediakan peruntukan berjumlah

RM29.4 juta bagi membiayai pelbagai inisiatif dan bantuan kepada rakyat dan barisan hadapan.

7. Peruntukan yang disediakan ini merangkumi semua aspek, antaranya Bantuan Bakul Makanan Keperluan Asas 2021, pembelian bekalan oksigen untuk kegunaan di hospital, dan sumbangan kepada waris pesakit-pesakit COVID-19 yang meninggal dunia. Bagi meringankan beban rakyat yang terjejas sumber pendapatan, Kerajaan Beta memberikan pengecualian sewa gerai dan pasar di bawah Pihak Berkuasa Tempatan (PBT) untuk bulan Januari dan Februari 2021 (Fasa 1) serta Jun dan Julai 2021 (Fasa 2). Manakala pengecualian sewa dan sewa beli turut diberikan untuk 3,395 unit Perumahan Awam Kerajaan Negeri Sembilan dan Program Perumahan Rakyat (PPR) di bawah Majlis Bandaraya Seremban selama 3 bulan.
8. Arahān Perintah Kawalan Pergerakan (PKP) dan Perintah Kawalan Pergerakan Diperketatkan (PKPD) merupakan langkah yang perlu diambil oleh Kerajaan untuk membendung pandemik ini. Namun, banyak pihak yang terputus punca pendapatan disebabkan tidak boleh keluar bekerja ataupun diberhentikan kerja oleh majikan. Justeru, bantuan dalam bentuk wang tunai secara *one-off* diberikan kepada golongan penjaja dan penjaja kecil tanpa premis. Bantuan tunai juga diberikan kepada Ketua isi Rumah (KIR) yang kehilangan pekerjaan melalui Bantuan Kehilangan Pekerjaan. Adalah diharapkan agar bantuan, inisiatif dan insentif yang disediakan ini dilaksanakan dengan sepenuhnya supaya kehidupan rakyat terus terpelihara dan tiada golongan yang tercicir.

Program Imunisasi COVID-19

Ahli-Ahli Dewan Sekalian,

9. Selain pematuhan SOP yang ketat, Beta berasa sukacita dengan langkah pelaksanaan Program Imunisasi Vaksin COVID-19 sebagai usaha untuk mewujudkan Imuniti Kelompok. Untuk mencapai matlamat ini, **lebih 100 Pusat Pemberian Vaksin (PPV)** meliputi Hospital, Klinik Kesihatan, Industri dan juga PPV Bergerak telah disediakan. Pada 28 Jun 2021, **PPV Mega IPT USIM** telah dibuka melaksanakan sebanyak **1,500 suntikan sehari** dan dinaikkan kepada **3,000 suntikan** sehari selepas seminggu beroperasi. PPV Industri juga telah dimulakan dan **D'Tempat Country Club, Sendayan**, dipilih sebagai **PPV Industri pertama** di Negeri Sembilan. Dari segi perancangan, lebih daripada 180,000 dos bekalan vaksin telah disediakan untuk bulan Jun 2021. Namun, setelah mengambil kira situasi semasa penularan kes COVID-19 di negeri ini, jumlah bekalan vaksin telah ditingkatkan kepada **melebihi 600,000 dos** pada bulan Julai dan Ogos.

10. Berdasarkan program kesedaran yang berkesan dan pelaksanaan PPV yang menyeluruh, Beta bersyukur jumlah rakyat Negeri Sembilan dewasa yang menerima vaksinasi lengkap 2 dos telah melebihi 80 peratus. Dengan ini, Negeri Sembilan juga telah mencapai imuniti kelompok (*herd immunity*) seperti yang kita sasarkan. Setinggi-tinggi tahniah dan penghargaan diucapkan kepada semua pihak sama ada jabatan, agensi

mahupun sukarelawan yang telah bersungguh-sungguh menyumbang masa dan tenaga dalam merealisasikan matlamat Program Imunisasi COVID-19.

Prestasi Ekonomi dan Kewangan Negeri Sembilan

Ahli-Ahli Dewan Sekalian,

11. Pertumbuhan ekonomi negara pada tahun 2020 adalah yang kedua terendah selepas krisis kewangan tahun 1998. Perintah Kawalan Pergerakan (PKP) telah membawa kepada pengurangan waktu operasi perniagaan dan penutupan sementara sebahagian sektor ekonomi yang memberi kesan kepada prestasi ekonomi negara.
12. Secara keseluruhannya, pada tahun 2020 prestasi ekonomi bagi semua negeri telah mencatatkan pertumbuhan negatif. Namun begitu, **Negeri Sembilan adalah antara lapan negeri yang merekodkan kadar pertumbuhan yang lebih baik, iaitu susut 3.6 peratus berbanding penyusutan 5.6 peratus di peringkat nasional**. Negeri Sembilan turut mencatatkan nilai Keluaran Dalam Negara Kasar (KDNK) Per Kapita (RM43,859) **melebihi paras nasional** (RM43,378).
13. Dari segi kewangan negeri, sekalung tahniah diucapkan kepada Kerajaan Beta kerana berjaya memperoleh kutipan hasil sebanyak RM447.88 juta pada tahun 2020. Walaupun berdepan dengan pandemik COVID-19,

Kerajaan Beta terus berusaha mengutip hasil ke paras yang membanggakan, iaitu **98%**. Hal ini membuktikan bahawa sasaran yang ditetapkan adalah realistik dan boleh dicapai. Sungguhpun menghadapi persekitaran ekonomi yang mencabar dan situasi Perintah Kawalan Pergerakan (PKP), strategi dan intervensi yang dilaksanakan serta komitmen semua agensi pemungut hasil, ternyata amat berkesan dan berjaya.

14. Beta berharap agar segala perancangan untuk memajukan negeri dan memperkasa rakyat dapat terus dilaksanakan melalui pelbagai inisiatif Belanjawan 2021 yang telah dibentangkan di Dewan ini.

Pelaburan di Negeri Sembilan Tahun 2020

15. Di sebalik pertumbuhan ekonomi nasional yang perlahan, Alhamdulillah, Pentadbiran Kerajaan Negeri Sembilan masih berupaya menarik sejumlah pelaburan yang amat membanggakan. Bagi tahun 2020, nilai pelaburan yang diluluskan oleh *Malaysia Investment Development Authority* (MIDA) adalah **sebanyak RM7.93 bilion**, berbanding RM6.96 bilion pada tahun 2019 (kenaikan 14%), dan ia merupakan pencapaian tertinggi yang pernah dicatatkan. Daripada jumlah tersebut, RM6.4 billion (80.7%) adalah disumbangkan oleh sektor perkilangan, perkhidmatan terpilih dan utama.
16. Pencapaian ini merupakan satu perkembangan yang sangat positif serta menjadi bukti bahawa dalam keadaan persekitaran yang tidak menentu ini,

Negeri Sembilan masih terus menjadi pilihan kepada pelabur domestik dan luar negara. Melalui usaha dan perancangan strategik, khususnya melalui pelancaran program Tahun Melabur Negeri Sembilan 2021 (*Invest NS Year 2021*), Beta yakin, hasrat Kerajaan Negeri menarik lebih ramai pelabur ke negeri ini akan tercapai. Pada masa yang sama, penumpuan kepada pelaburan berteknologi tinggi yang disasar akan meningkatkan pertumbuhan ekonomi negeri, di samping menyediakan peluang pekerjaan kepada rakyat tempatan.

Cabarau Dan Budaya Norma Baharu

Ahli-Ahli Dewan Sekalian,

17. Sememangnya pandemik COVID-19 ini telah mengubah lanskap kehidupan kita di setiap peringkat. Pelbagai situasi yang tidak pernah dialami dan mungkin tidak pernah terlintas di fikiran kita, telah berlaku pada masa ini. Ini seharusnya menjadi pengajaran kepada kita untuk sentiasa bersedia dan saling bersatu hati dalam menghadapi pelbagai cabaran. Beta amat berharap supaya Ahli Dewan menggunakan peluang dan ruang untuk memberi perhatian kepada usaha untuk membantu rakyat dan juga membangunkan ekonomi negeri yang terjejas. Di samping itu, usaha bersepada perlu digiatkan melibatkan pemimpin masyarakat, ketua agama

dan pertubuhan bukan kerajaan (NGO) untuk memutuskan rantaian jangkitan pandemik ini.

18. Bagi tujuan ini, pemantapan kemudahan digital perlu dipertingkatkan dan Beta yakin melalui Gerbang Digital Negeri Sembilan atau N9.Digital akan dapat membantu rakyat bukan sahaja di bandar tetapi juga di luar bandar. Medium digital akan menjadi teras dalam sistem penyampaian dan perkhidmatan sebagai budaya norma baharu dalam semua sektor seperti ekonomi, pendidikan, perniagaan dan keusahawanan, termasuk juga sektor pertanian dan pelancongan.
19. Walaupun ketika ini, sektor pelancongan merupakan antara sektor yang terjejas teruk akibat pandemik COVID-19, namun ia merupakan sektor yang amat berpotensi untuk berkembang setelah pandemik ini berakhir. Rakyat sentiasa menanti-nantikan peluang untuk beriadah dan melancong. Oleh itu, perancangan dan persiapan yang rapi perlu dilaksanakan, khususnya kemudahan infrastruktur serta mempergiatkan aktiviti promosi, demi memastikan ketersediaan negeri yang bakal menjadi tempat tumpuan pelancong selepas pandemik ini reda dan terkawal.

Pembangunan Seimbang

Ahli-Ahli Dewan sekalian,

20. Beta berasa suka cita dengan dasar pembangunan komprehensif seperti digariskan oleh Kerajaan Negeri yang meliputi setiap daerah di negeri ini. Selain kawasan Lembah Wawasan Malaysia 2.0 (MVV 2.0), yang menumpukan kepada pembangunan industri, Jelebu pula akan memfokuskan kepada pembangunan sektor biodiversiti dengan memanfaatkan keindahan alam semula jadi.
21. Sementara itu kawasan Rembau, Tampin, Jempol dan Kuala Pilah akan dibangunkan sebagai wilayah agropolis. Pembangunan wilayah agropolis mampu menjadikan Negeri Sembilan sebagai hab pengeluaran dan pengedaran sumber makanan utama kepada Lembah Klang. Dalam hal ini, Beta berharap agar semua pihak memainkan peranan masing-masing untuk membantu Kerajaan Negeri merealisasikan dasar pembangunan ini dan seterusnya dapat memberi manfaat yang besar kepada ekonomi masyarakat setempat.

Pemerkasaan Majlis Agama Islam Negeri Sembilan

22. Sebagai Ketua Agama Islam Negeri, Beta mahu supaya perhatian serius diberikan terhadap usaha meningkatkan ekonomi dan kualiti hidup umat Islam. Bagi mencapai hasrat ini, Majlis Agama Islam Negeri Sembilan

(MAINS) telah distrukturkan semula berkuatkuasa 1 Januari 2021. Penstruktur semula ini melibatkan penyelarasan fungsi Perbadanan BaitulMal Negeri Sembilan di bawah bidang kuasa MAINS melalui Rang Undang-Undang Perbadanan Baitulmal Negeri Sembilan (Pemansuhan) 2021.

23. Seterusnya peranan dan fungsi MAINS diperkasakan untuk memajukan ekonomi dan sosial umat Islam di Negeri Sembilan dengan menubuhkan Perbadanan MAINS di bawah struktur MAINS, yang bertanggungjawab menguruskan hal ehwal pelaburan, perniagaan dan pengkomersilan bagi pihak MAINS serta perkara-perkara lain yang berkaitan dengannya. Bagi merealisasikan matlamat ini, Rang Undang-Undang Perbadanan MAINS 2021 akan dibentangkan di dalam sidang Dewan Undangan Negeri pada kali ini.
24. Beta juga berasa sukacita berdasarkan prestasi kutipan zakat di negeri ini yang mencatatkan peningkatan setiap tahun dan ia mencerminkan kebertanggungjawaban yang tinggi di kalangan umat Islam. Bagi tahun 2020, sebanyak RM144.1 juta kutipan zakat merangkumi zakat harta dan zakat fitrah telah diperoleh berbanding RM141.5 juta pada tahun 2019. Alhamdulillah, jika sebelum ini golongan asnaf hanya menerima RM250 tanpa mengira bilangan isi rumah, namun MAINS telah menambah baik agihan zakat mengikut had kifayah, dan melalui kaedah ini, asnaf akan menerima agihan zakat antara RM250 hingga RM800 mengikut per kapita isi rumah. Dalam mendepani pandemik COVID-19 pula, MAINS telah

menyalurkan sebanyak RM5.6 juta sepanjang Jun hingga Julai 2021 untuk membantu golongan yang terjejas merangkumi bantuan tunai, bantuan makanan, termasuk keperluan dan peralatan kepada barisan hadapan.

25. Adalah diharapkan agar Kerajaan akan terus memartabatkan lagi Agama Islam dan umat Islam di negeri ini menerusi gerak kerja yang professional bagi membuktikan kemampuan sebenar pengurusan Islam sebagai Ad-din. Perhatian serius kepada usaha memajukan umat Islam ini tidak sesekali menjadi alasan untuk mengabaikan atau meminggirkan rakyat Beta yang lain. Ini jelas terbukti melalui usaha dan inisiatif belanjawan 2021 Kerajaan Beta yang merentasi sempadan bangsa dan agama. Antara langkah yang telah diambil ialah penyediaan bantuan kepada Sekolah Jenis Kebangsaan Cina, Sekolah Jenis Kebangsaan Tamil dan Sekolah Swasta berjumlah RM2.5 juta, hibah takaful kepada bukan Islam berjumlah RM0.5 juta dan penyaluran Akaun Amanah Hal Ehwal Bukan Islam berjumlah RM1.8 juta.

Penutup

Ahli-Ahli Dewan Sekalian,

26. Usaha untuk memerangi dan memutuskan rangkaian penularan pandemik COVID-19 masih belum selesai. Komitmen berterusan dari semua pihak amat diharapkan bagi memastikan setiap lapisan masyarakat dapat dibantu dan diberi perhatian. Bagi mencapai hasrat ini, pembudayaan norma baharu perlu diterapkan dan dijadikan amalan berterusan.

27. Beta menyeru semua pihak agar bermuhasabah diri dan menjalankan amanah yang telah dipertanggungjawabkan supaya matlamat untuk memberi kesejahteraan kepada rakyat dan seterusnya menjadi negeri maju akan terlaksana. Kesefahaman dan kerjasama antara satu sama lain akan dapat memastikan sistem penyampaian perkhidmatan yang lebih berkesan dan efektif.
28. Beta menzahirkan penghargaan kepada Menteri Besar serta seluruh jentera pentadbiran Kerajaan Beta atas kesungguhan yang telah ditunjukkan bagi memastikan kemajuan dan pembangunan negeri ini sentiasa berada di landasan yang tepat. Permasalahan dan keperluan rakyat terus menjadi agenda utama dalam setiap tindakan Kerajaan bagi menjamin kesejahteraan rakyat tetap terpelihara.
29. Oleh yang demikian, berbahas dan berhujahlah secara rasional dan berhemah atas prinsip mendahulukan kepentingan rakyat dan negeri atas perkara-perkara yang boleh membawa kebaikan dan manfaat bersama. Berkhidmatlah dengan ikhlas demi negeri yang kita kasih, agar matlamat kita untuk mencapai kejayaan dapat direalisasikan.
30. Akhir titah, Beta mengingatkan Ahli Dewan yang mulia ini agar sentiasa menghayati, melindungi, memelihara dan mempertahankan Perlembagaan Persekutuan dan Undang-Undang Tubuh Kerajaan Negeri Sembilan. Peraturan-Peraturan Tetap Dewan juga hendaklah sentiasa dipatuhi

semasa berhujah dan sepanjang persidangan berlangsung. Beta dan Tunku Ampuan Besar sentiasa berdoa semoga Allah S.W.T akan sentiasa memberi rahmat dan hidayah-Nya kepada seluruh rakyat Beta untuk terus dilimpahi kemakmuran yang berkekalan.

Dengan lafaz suci **BISMILLAHIRRAHMANIRRAHIM**, Beta merasmikan Pembukaan Persidangan Pertama Penggal Keempat Dewan Undangan Negeri ke-14.

Sekian.

Wabillahitaufik Walhidayah Wassalamualaikum Warahmatullahi Wabarakatuh.